

CUSSEGL GROND

Sessiun da favrer 2024

Dumonda da la fracziun da la PPS concernent l'execuziun giudiziala en il chantun Grischun (emprim sutsegnader Stocker)

En il Stabiliment giudizial Realta vegnan messas a disposiziun dapi l'onn 2009 tut en tut 16 plazzas d'execuziun per l'arrest administrativ tenor il dretg da persunas estras. Ma tenor il rapport da la Cumissiun naziunala per la prevenziun cunter la tortura (CNPT) e tenor ina sentenza dal Tribunal federal (cf. 2C_662/2022) na satisfan questas plazzas – prima vista – betg pli a las pretensiuns d'ozendi, perquai che las localitads hajan tranter auter il «cler caracter d'ina praschun».

Ina collocaziun en questa partiziun vegn ad esser pussaivla mo pli a cundiziuns severas ed en cas singuls. Per quest motiv ha stui vegnir visà – tenor la missiva dal preventiv 2024 – in contract correspondent cun il chantun Tessin. Suenter questa visada dal contract vegnan a crudar davent ulteriuras dunsenas. Quai vegn ad engrevgiar il preventiv global da l'Uffizi per l'execuziun giudiziala. Actualmain vegnan las localitads evidentamain utilisadas da l'Uffizi da migraziun e da dretg civil.

L'utilisaziun actuala da las plazzas d'execuziun, dentant er l'occupaziun ed il grad da la cuvrida dals custs dal Stabiliment giudizial Cazas Tignez procuran per dumondas. Da la gestiun currenta dal Stabiliment giudizial Cazas Tignez duess resultar – tenor la missiva da construcziun (cf. missiva carnet nr. 6 2015/2016) – in surpli dal retgav che duess furnir ina contribuziun da garanzia annuala als custs d'investiziun. Quella giada eran ils custs da gestiun vegnids eruids cun ina «occupaziun da 95 % ch'è vegnida stimada precautamain», ma tenor il quint annual 2022 è l'occupaziun mo 85 pertschient. Plinavant pon ins leger en il rapport da la CdG 2022/23, che las dunsenas ch'eran vegnidas empermessas en la missiva d'investiziun, na pon betg vegnir cuntanschidas.

Vitiers vegnan rapports en las medias che dattan in nausch attestat a la direcziun da la praschun. Sut l'aspect da quests eveniments, che na mettan l'execuziun giudiziala betg en ina buna glisch, supplitgain nus la Regenza da responder las suandantas dumondas:

1. Co vegn garantì l'arrest administrativ tenor il dretg da persunas estras en il chantun e cun tge custs (supplementars) èsi da far quint?
2. Co vegnan utilisadas en il futur las 16 plazzas d'execuziun, per ch'ellas possian furnir ina contribuziun per cuvrire ils custs?
3. Quant auts èn ils custs da gestiun nets dal Stabiliment giudizial Cazas Tignez e co divergeschan quests custs da las calculaziuns en la missiva d'investiziun?
4. Pertge n'han ins betg (anc) pudì cuntanscher las finamiras concernent l'occupaziun e concernent las entradas ord las dunsenas, ch'èn menziunadas en la missiva?

Cuira, ils 14 da favrer 2024

Stocker, Roffler, Metzger, Berthod, Butzerin, Candrian, Casutt, Cortesi, Della Cà, Dürler, Favre Accola, Grass, Heim, Koch, Krättli, Lehner, Menghini-Inauen, Morf, Rauch, Sgier, Weber